



Cumün da Lavin

Uorden da sepultüra e da sunteri pel cumün da Lavin

A basa da l'ordinaziun chantunala davart ils affars da sepultüra dals 27 october 1998 e relaschè da la radunanza cumünala dals 21-06-2012.

Las fuormas seguaintas chi's referischan sün persunas vegnan scrittas in fuorma masculina e valan sia pel gener masculin sco eir pel gener feminin.

I. DISPOSIZIUNS GENERALAS

Art. 1: Surveglianza ed execuziun

La surveglianza dal sunteri suprastà al magistrat. Quel es respunsabel per l'execuziun da quist reglamaint.

Art. 2: Incumbensas

Il magistrat ha impustüt d'accumplir las seguaintas incumbenzas:

- survegliar l'eriger dals monumaints sepulcral e da l'inramaziun, sco eir il mantegniment e la cultivaziun da las fossas;
- ordinar il levar da las fossas, davo chi'd es scuors il temp da pos da quellas;
- conceder permiss excepziunals per la sepultüra da persunas chi nu veivan domicil a Lavin;
- tscherner e survegliar il personal da servezzen pel sunteri;
- controllar il register da fossas.

II. UORDEN DA SEPULTÜRA

Art. 3: Comunicaziun da mortoris

Mincha mortori ha da gnir comunicà infra 24 uras a la cancellaria cumünala. La cancellaria cumünala organisescha la preparaziun da la fossa e contactescha il culuoster.

Il culuoster pissara cha la portantina e l'urna da condolentscha vegnan postadas avant il funeral al lö indichà.

In cas spezials, sco p. ex. pro baras chattadas chi sun sainza relaschats, piglia la cancellaria cumünala tuot las disposiziuns necessarias per la sepultüra.

Art. 4: Metter in vaschè

Ün defund das-cha gnir miss aint il vaschè pür davo ch'ün meidi chi pratichescha in Svizra ha constattà sia mort.

Per metter in vaschè baras cun privel da contagiun, dan norma las prescripziuns federalas.

Art. 5: Transport da baras

Il transport da baras nan da pajais esters ed a l'ester, sco eir in oters cas spezial es chosa dals relaschats. Las prescripziuns spezialas da la confederaziun e dal chantun restan resalvadas.

Art. 6: Dret da sepultüra

Tuot las personas mortas chi vaivan domicil a Lavin e quellas mortas sül territori dal cumün da Lavin sco eir baras chattadas quia, pon gnir sepulidas sül sunteri.

I nu das-cha gnir refüsà ad ingün üna sepultüra dezainta sül sunteri causa ideas da cretta o per oters motivs.

Art. 7: Permiss excepziunal

Persunas mortas utrò chi nu veivan domicil a Lavin pon gnir sepulidas quia be cul permiss dal magistrat.

Ün tal permiss ha dad esser güstifichà tras circumstanzas extraordinarias. El vain concess impustüt a vaschins, o scha'l trapassà vaiva relaziuns plü strettas cul cumün da Lavin.

Art. 8: Taxas da sepultüra

Las taxas per las singulas sepultüras etscha il cumün seguond l'uorden da taxas correspundent relaschè da la radunanza cumünala.

Art. 9: Sain da mort

Per mincha sepultüra in cumün vain sunà il sain da mort.

III. UORDEN DA SUNTERI

Art. 10: Register da fossas

L'administraziun cumünala maina il register da fossas. In quel han da gnir inscittas consecutivamaing las fossas numeradas insembel cul cunom, nom, data da naschentscha e data da mort dals sepulits.

Art. 11: Arrandschamaint da las fossas

L'arrandschamaint da las fossas as drizza seguond il plan da rouda da sunteri.

Art. 12: Distanza e chafuollezza da las fossas

La distanza tanter las singulas fossas ha d'importar almaina 50 cm.

Las fossas sun da chavar culla seguainta chafuollezza minimala:

- creschüts ed uffants sur 10 ons 1.50 m
- uffants suot 10 ons 1.20 m
- urnas 0.60 m

Art. 13: Urnas

Las urnas vegnan lovadas in terra illa part dal sunteri reservada a quel scopo.

Sün giavüs ch dals relaschats po gnir permiss da lovar l'urna in üna fossa existenta, obain da lovar plüssas urnas ill'istessa fossa.

Il temp da repos da la fossa in dumonda nu vain müdà quattras. Pel temp da repos es decisiva la data da la plü veglia sepultüra. Scha la fossa vain levada avant il turnus prescrit sto la tschendra gnir lovada aint illa fossa cumünaila.

Urnas chi vegnan sepulidas illa terra, ston esser da terracotta o da lain. Metal nun es admiss.

Art. 14: Fossa cumünaivla

La fossa cumünaivla dal sunteri sta a disposiziun a relaschats chi nu vöglian avair üna fossa per l'urna. In quista fossa vain sepulida be la tschendra.

La fossa cumünaivla nu das-cha gnir imbellida cun decoraziuns individualas.

Medemmamaing staja liber als relaschats da metter là be la tschendra da las urnas chi vegnan levadas.

Art 15: Pos da la fossa

Il pos da la fossa düra almain 25 ons per fossas cun vaschels sco eir per fossas cun urnas. Scha cun levar fossas davo scuors il temp da pos da quella e schi vessan eventualmaing amo da gnir a parair restanzas da las spoglias mortalas e dad urnas, lura tillas esa darcheu da sepulir in möd dezaint. Tschendra sto gnir lovada aint illa fossa cumünaivla.

Art. 16: Revocaziun da fossas

Scha'l magistrat ordina, davo chi'd es scuors il temp da pos da las fossas, cha quellas vegnan levadas, ha'l da comunicar quietant directamaing a la parantella, premiss cha l'adressa da quella saja cuntschainta. Quista comunicaziun ha da gnir fatta almain trais mais avant il termin fixà per levar las fossas correspudentas. Culla comunicaziun esa da render attent cha'ls monumaints sepulcral e'ls roms da las fossas hajan da gnir allontanats e cha, scha quai nu vess da succeder, schi cha'l cumün lascha far quellas lavuors inchargiant ils cuosts a la parantella.

Da monumaints sepulcral e roms da las fossas chi nu vegnan tuts in consegna a temp dispuona il magistrat libramaing.

Ingüns monumaints nu pon gnir fixats vi dal mür d'baselgia o cunter il mür da sunteri.

Art. 17: Roms da las fossas

Admissas sun be inramaziuns da crap.

Las inramaziun chi circundeschan las fossas ston avair las seguaintas masüras externas: Lunghezza maximala 1.60 m, larghezza maximala 0.65 m, otezza 0.10 m.

Per las fossas da las urnas valan las seguaintas masüras da l'inramaziun: lunghezza maximala 0.80 m, larghezza maximala 0.50 m, otezza 0.10 m.

La distanza aint illa culonna tanter üna fossa e l'otra importa 50 cm.

Art. 18: Monumaints sepulcral

Admiss sun be monumaints da crap, lain e fier, elavurà a man (ingün fier fuondü) chi nu surpassan l'otezza da 100 cm, masürà dal terrain insü.

Ils monumaints pellas urnas nu das-chan surpassar l'otezza da 50 cm dal terrain sü.

Il monumaint nu das-cha esser plü larg co l'inromaziun da la fossa.

Art. 19: Mantegnimaint e cultivaziun da las fossas

Las fossas dessan gnir mantgnüdas in ün stadi chi correspuonda a la dignità d'ün sunteri. Fossas neglettas po il magistrat far metter in uorden a quint dals paraints o far semnar aint quellas cun erba.

I nu das-cha gnir cumprà oura ingün terrain per fossas da famiglia.

IV. DISPOSIZIUNS PENALAS E FINALAS

Art. 20: Disposiziuns penals

Cuntravenziuns a quist reglamaint vegnan chastadas dal magistrat cun multa fin a frs. 1'000.--.

L'execuziun da la disposiziun a cuosts dal culpabel sco eir il transferimaint al güdisch penal restan resalvats.

La procedura as drizza davo las disposiziuns chantunalas davart la procedura penala avant autoritats administrativas (art. 177 sqq. PP).

Art 21: Dret abrogà

Quist reglamaint rimplazza quel dals 21 october 1958, revis als 25 gën 2002 ed als 21 gën 2012. Cun sia entrada in vigur sun abolidas tuot las disposiziuns cumünalas chi stan in cuntradicziun cun quist reglamaint.

Art 22: Entrar in vigur

Il reglamaint preschaint aintra in vigur al mumaint ch'el vain acceptà da la radunanza cumünala.

Decis uschè da la radunanza cumünala dals 21-06-2012.

El rimplazza il regulativ da sunteri dals 25-06-2002.

Lavin, ils 21-06-2012

Il cuvi:

Il chanzlist:

.....
Linard Martinelli

.....
Fabian Schorta